

摘藻堂四庫全書薈要

集部

欽定四庫全書蒼要卷一萬八千六百九十五

集部

御定佩文齋詠物詩選卷七十三

龍門山類

五言古

過蜀龍門

唐
沈佺期

龍門非禹鑿詭怪乃天功西南出巴峽不與衆山同長
竇亘五里宛轉復嵌空伏湍煦潛石瀑布生輪風流水
無晝夜噴薄龍門中潭河勢不測藻葩垂彩虹我行當

季月煙景共春融
江關勤亦甚
巖穹意難窮
逝將息機
事煉藥此山東

龍門山八詠

唐

劉長卿

龍門

秋山日搖落
秋水急波瀾
獨見魚龍氣
長令煙雨寒
誰窮造化力
空向兩崖看

水東渡

山葉傍崖赤
千峰秋色多
夜泉發清響
寒渚生微波
稍

待沙上月歸人爭渡河

福公塔

寂莫對伊水經行長未還東流自朝暮千載空雲山誰
見白鷗鳥無心洲渚間

遠公龕

松路向精舍花龕歸老僧閒雲隨錫杖落日低金繩入
夜翠微裏千峰明一燈

石樓

隱隱見花閣，隔河映青林。
水田秋鴈下，山寺夜鐘深。
寂寞羣動息，風泉清道心。

下山

誰識往來意，孤雲長自閒。
風寒未渡水，日暮更看山。
木落衆峰出，龍宮蒼翠間。

水西渡

伊水搖鏡光，纖鱗如不隔。
千龕道傍古，一鳥沙上白。
何事還山雲，能畱向城客。

渡水

日暮下山來千山暮鐘發不知波上棹還弄山中月伊
水連白雲東南遠明滅

龍門

元
袁
桷

蒼厓出雙闕羣山頰首尊陰風起晴雷摩蕩晝日昏鐵
峽擁偪仄百川為之奔疑下有龍湫逞怪蹲天門滄兮
出膚寸頃刻黃流渾側徑出石壁巨浸畱遺痕緬昔設
天險事久難窮論征衣襲輕雨神君儼雲根

七言古

龍門應制

唐
宋之問

宿雨霽氛埃，流雲度城闕。
河堤柳新翠，苑樹花先發。
洛陽花柳此時濃，山水樓臺映幾重。
羣公拂霧朝翔鳳，天子乘春幸鑿龍。
鑿龍近出王城外，羽從琳琅擁軒蓋。
雲罕纔臨御水橋，天衣已入香山會。
山僻蘄巖斷復連，清流澄澈俯伊川。
鴈塔遙遙綠波上，星龕奕奕翠微邊。
層巒巒舊長千尋，木遠壑初飛百丈泉。
綵仗蜺旌繞香閣，下

輦登高望河洛東城宮闕擬昭回南陌溝塍殊綺錯林
下天香七寶臺山中有酒萬年杯微風一起祥花落仙
樂初鳴瑞鳥來鳥來花落紛無已稱觴獻壽煙霞裏歌
舞淹畱景欲斜石間猶駐五雲車鸞旗翼翼畱芳草龍
騎駸駸映晚花千乘萬騎鑿輿出水靜山空巖警蹕郊
外喧喧引看人傾都南望屬車塵囂聲引颺開黃道王
氣周回入紫宸先王定鼎山河固寶命乘周萬物新吾
君不事瑤池樂時雨來觀農扈春

五言律

龍門

唐
杜甫

龍門橫野斷驛樹出城來氣色皇居近
金銀佛寺開往來時屢改川陸日悠哉
相閱征途上生涯盡幾回

龍門

元
周伯琦

踰險夢頻悖循夷氣始渝千巖竒互獻
萬壑勢爭趨峭壁劔門壯重梁皇渚紆
凡鱗期變化雷雨在斯須

五言排律

奉和春日遊龍門應制

唐 武三思

鳳輦臨香地，龍輿上翠微。
星宮含雨氣，月殿抱春輝。
碧澗長虹下，雕梁早燕歸。
雲疑浮寶蓋，石似拂天衣。
露草侵階長，風花繞席飛。
日斜宸賞洽，清吹入重闈。

扈從度龍門

明 王 英

邊塞山川壯，關城地勢雄。
崖傾開鳥道，路險瞰龍宮。
後隊千旗擁，前驅一騎通。
紆迴多傍澗，登陟半凌空。
雨霽巖前霧，香飄樹杪風。
雲隨仙仗白，花映御衣紅。
景屬陽

和後恩覃化育中臨高湏刻石從此紀神功

七言律

龍門

元 馬祖常

萬壑奔流一峽開君王歲歲御龍來人間塵土常相隔
天上星辰到此迴草木四時承午日風雲半夜束春雷
自慚曾奏長楊賦跋馬徬徨念暴鱗

龍門山中即事

明 郊 韶

雷雨過厓驚落湍空林白晝忽生寒陰陰草閣開樽坐

細細山雲捲幔看落日樵聲經木末青天鳥道挂雲端
亦知吏隱非吾事直欲從茲賦考槃

御定佩文齋詠物詩選卷七十三

欽定四庫全書蒼要卷一萬八千六百九十六集部
御定佩文齋詠物詩選卷七十四

峰類

五言古

登太白峰

唐李白

西上太白峰夕陽窮登攀太白與我語為我開天關願
乘冷風去直出浮雲間舉手可近月前行若無山一別
武功去何時復更還

送溫處士歸黃山白鷺峰舊居 李白

黃山四千仞三十二蓮峰丹崖夾石柱菡萏金芙蓉伊
昔昇絕頂下窺天目松仙人鍊玉處羽化畱餘蹤亦聞
溫伯雪獨往今相逢採秀辭五嶽攀巖歷萬重歸休白
鷺嶺渴飲丹砂井鳳吹我時來雲車爾當整去去陵陽
東行行芳桂叢迴谿十六度碧嶂盡晴空他日還相訪
乘橋躡綵虹

紫閣峰

李白

紫閣連終南青冥天倪色憑崖望咸陽宮闕羅北極萬
井驚畫出九衢如弦直渭水清銀河橫天流不息

夢登太白峰

唐常建

夢寐升九崖杳靄逢元君攜我太白峰寥寥辭垢氛結
宇在霄漢宴林閉氤氳檐楹覆餘翠巾鳥生片雲時往
谿谷間孤亭晝仍曛松風引天影石瀨清霞文恬目緩
舟趣霽心投鳥羣春風又搖櫂潭島花紛紛

第三峰

常建

西山第三頂茅宇依雙松杳杳欲至天雲梯昇幾重瑩
魄澄玉虛以求鸞鶴蹤逶迤飛天人執節乘赤龍旁映
白日光縹緲輕霞容孤輝上煙霧餘影明心胸願與黃
麒麟欲飛而莫從因寂清萬象輕雲自中峰山暝學棲
鳥月來隨暗蛩尋空靜餘響嫋嫋雲谿鐘

仙娥峰下作

唐白居易

我為東南行始登商山道商山無數峰最愛仙娥好參
差樹若挿匝匝雲如抱渴望寒玉泉香聞紫芝草青巖

屏削碧白石牀鋪縞向無如此物安足畱四皓感彼私
自問歸山何不早可能塵土中還隨衆人老

遊蘆峰分韻得盡字

宋朱子

蘆山一何高上上不可盡我行獨忘疲泉石有招引須
臾一蒙密矯首眺無畛已謂極崢嶸仰視猶隱嶙新齋
小休憩餘力更勉黽東峰切霄漢首夏正淒緊杖策同
攀躋極目散幽窘萬里俯連環千重瞰孤隼因知平生
懷未與塵累泯歸途採薇蕨晚餉雜蔬筍笑謂同來人

此願天所允獨往會淹畱寒樓甘茵蠹山阿子慕予無
憂勒回軫

徑山五峰

宋 應祖 銘

堆珠峰

天勢下凌霄坐使萬壑趨元氣結巒岫獻此大寶珠翊
殿護釋梵鼓鐘殷人區

大人峰

五髻生雲雨鎮踞何春容具此大人相題為大人峰偉

哉天地間萬象同擴充

鵬搏峰

峰勢來大鵬鼓此垂天翼培風本無待適茲造化力何
須問天池在在六月息

宴坐峰

松杉太古色不別春與冬道人此宴坐一念萬劫融不
特座燈王等了諸法空

朝陽峰

二儀開幽漠日月臨下土萬物麗高明此峰正當午
堂大聖人两眼空寰宇

熊耳峰

元 安 熙

窮探不憚遠行登最高峰頓覺天宇近一洗羣山空
竒哉此絕境造化天無功神襟一以曠寫我浩蕩胸
遠意殊未極更思脫樊籠何當著神鞭駕此慵飛龍
翩翩上箕尾再見開鴻濛長嘯暮雲合輕衣振天風

飛來峰

明 史 鑑

以圖山澤遊苦為風雨款驚雷破重陰及晨光已顯透
迤入幽深厲揭渡清淺靈山傳飛來合澗互回轉蘿垂
手可捫松高蓋惟偃陽厓丹霞凝陰洞蒼雪滿秀色如
何攬絕巘竟誰棧衆竅因風號羣芳遲春行追念平生
歡歷歷如在眼匪無新相知已少舊遊伴老僧久見招
相攜集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

七言古

東峰歌

唐 溫庭筠

錦礫潺湲玉谿水
曉來微雨藤花紫
冉冉山雞紅尾長
一聲樵斧驚飛起
松刺流空石差齒
煙香風軟人參蕊
陽崖一夢伴雲根
仙菌靈芝夢魂裏

五言律

題西峰

唐 陳子昂

為愛西峰好吟頭
盡日昂巖花紅作陣
谿水綠成行終
古礙新月半山無
夕陽寄言嘉遯客
此處是仙鄉

中峰居喜見苗發

唐祖詠

自得中峰住深林亦閉關經秋無客到入夜有僧還
暗澗泉聲小荒岡樹影閒高窗下可望星月滿空山

喜入蘭陵望紫閣峰呈宣上人

唐李益

薤草開三徑巢林喜一枝地寬畱種竹泉淺欲開池
紫閣當踈牖青松入短籬從今安僻陋蕭相是吾師

夏日登靈隱寺後峰

唐方干

絕頂無煩暑登臨三伏中深蘿難透日喬木更含風山
疊雲霞際川傾世界東那知茲夕興不與古人同

中峰

宋林逋

中峰一徑分盤折上幽雲夕照前邛見秋濤隔嶺聞長
松含古翠仙藥動微薰自愛蘇門嘯懷賢事不羣

次林擇之涼峰韻

宋朱子

解轡林間寺歸鴉晚欲盤望中嵐翠合愁外夕陽殘尊
酒何妨醉羈心且自寬無端滿窗月遙夜不勝寒

天柱峰

元張翥

一柱標南紀神功自斷鼇寒通岫屢遠勢敵祝融高異
鳥流清響神燈見白毫危巔可觀日夜湧海東濤

五言排律

蓮花峰

唐劉得仁

太華萬餘重苔堯只此峰當秋倚寥泐入望似芙蓉翠
拔千尋直青危一朶穠氣分毛女秀靈有羽人蹤倒影
侵關路香風激廟松塵埃終不及車馬自憧憧

七言律

萬安縣芙蓉峰

宋戴復古

凌空傑閣為誰開，隔岸芙蓉不用栽。
今古相傳彩雲現，江山曾識大蘇來。
酒邊歌舞共一笑，客裏登臨能幾回。
翠浪玉虹從此去，明朝人在鬱孤臺。

秋日登玉峰

宋徐璣

玉琢孤峰壓富沙，人行峰頂步雲霞。
谿流緩去幾回曲，樹色幽分無數家。
翠拂寒煙平似水，紅飄霜葉遠如花。

明朝重向城中望對此孤峰興轉賒

遊支硎南峰

元 鄭元祐

詞客幽尋勝洞庭神僧名跡在支硎馬騎仄徑猶存石
鶴放巔崖尚有亭巖底泉飛輕練白峰頭龕蝕古苔青
到來頓醒紅塵夢萬樹松濤沸紫冥

遊南高峰

明 王世貞

從遊指點南高峰躡屩攀蘿興不賒畫裏餘杭人賣酒
鏡中湖曲棹穿花千巖半出分秋雨一徑微明逗晚霞

最是夜歸幽絕處疎林燈火傍漁家

五言絕句

師子峰

明高啟

風生百獸低欲吼空山夜疑是天目巖飛來此山下

含暉峰

高啟

演漾弄晴暉江山秋斂霏我吟康樂句日暮澹忘歸

七言絕句

紫閣峰

唐邵謁

壯國山河倚空碧迴拔煙霞侵太白綠崖下視千萬尋
青天只據百餘尺

統漢峰下

唐
李益

統漢峰西降戶營黃河戰骨擁長城只今已勒燕然石
此地無人空月明

題中峰

唐
費冠卿

中峰高拄沈寥天上有茅菴與石泉晴景獵人曾望見
青藍色裏一僧禪

飛來峰

唐方干

邃巖喬木夏藏寒
牀下雲谿枕上看
臺殿漸多山更重
却令飛去即應難

石廩峰次敬夫韻

宋朱子

七十二峰都插天
一峰石廩舊名傳
家家有廩高如許
大好人間快活年


次黃叔張宿涼峰韻

朱子

菡萏含跼天外秀
婆娑散影月中孤
惜無畫手追前輩

寫得涼峰憩寂圖

御定佩文齋詠物詩選卷七十四



總校官庶吉士臣侍朝

校對官中書臣王瓚

謄錄監生臣唐澐

謄錄監生臣汪兆鯤

欽定四庫全書薈要

集部

御定詠物詩選卷

七十五至
八十二

詳校官原任主事 臣 李斯咏

欽定四庫全書薈要卷一萬八千六百九十七

集部

御定佩文齋詠物詩選卷七十五

嶺類

五言古

奉使嵩山途經緱嶺

唐

宋之問

侵星發洛城城中歌吹聲畢景至緱嶺嶺上煙霞生草
樹饒野意山川多古情大隱德所薄歸來可退耕

早上五盤嶺

唐

岑參



平旦驅駟馬曠然出五盤江回兩崖鬪日隱羣峰攢蒼
翠煙景曙森沈雲樹寒松踈露孤驛花密藏回灘棧道
谿雨滑畬田原草乾此行為知己不覺蜀道難

秋雲嶺

唐

劉長卿

山色無定姿如煙復如黛孤峰夕陽後翠積秋天外雲
起遙蔽虧江回頻向背不知今遠近到處猶相對

崢嶸嶺

唐

孟郊

疏鑿順高下結構紅煙霞坐嘯郡齋肅玩竒石路斜古

樹浮綠氣高門結朱華始見崢嶸狀仰止逾可嘉

過分水嶺

孟郊

山壯馬力短路行石齒中十步九舉轡迴環失西東
谿水變為雨懸厓陰濛濛客衣飄搖秋葛花零落風白日
舍我去征途忽然窮

桑乾嶺

元
袁
桷

茲山西北來旋轉十二雷昔人望鄉處特立何崔嵬
我來坐絕頂雲漢森昭回出日騰金鉦積露流銀臺長空

不受暑雪花散皚皚
羶車引繩過屈曲腸
九迴微蹤媿
三至南望心低徊
長風馬耳迅何當
賦歸來

五言律

松山嶺

唐 宋之問

翼翼高旌轉鏘鏘
鳳輦飛塵消清蹕
路雲濕侍臣衣白
羽搖丹壑天營逼
翠微芳聲耀今古
四海警宸威

夜宿七盤嶺

唐 沈佺期

獨游千里外高卧七盤
西山月臨窓近天河入
戶低芳

春平仲綠清夜子規啼浮客空留聽褒城聞曙雞

遊鳳林寺西嶺

唐

孟浩然

共喜年華好來遊水石間煙容開遠樹春色滿幽山壺
酒朋情洽琴歌野興閒莫愁歸路暝招月伴人還

玉山嶺上作

唐

皇甫曾

悠悠驅匹馬征路上連岡晚翠深雲竇寒苔淨石梁荻
花偏似雪楓葉不禁霜愁見前程遠空郊下夕陽

韶州送竇司直出嶺

唐

羅鄴

江曲山如畫，貪程亦駐舟。
果隨巖狖落，槎帶水禽流。
客散他鄉夜，人歸故國秋。
樽前挂帆去，風雨下西樓。

過秦嶺

唐孟貫

古今傳此嶺，高下勢崢嶸。
安得青山路，化為平地行。
蒼苔留虎跡，碧樹障谿聲。
欲過一回首，踟躕無限情。

千秋嶺上

宋晁補之

永日倦高躋，盤回四望迷。
松根危抱石，嶺路曲隨谿。
馬腹飛雲薄，山腰過雨低。
陰崖不可度，誰此構長梯。

過黃塘嶺

宋

朱子

屈曲危厓轉沈陰
山氣昏蟬聲高樹暗
石瀨淺流喧已
過黃塘嶺欲覓桃花源
無為此留滯驅馬踰山樊

登梅嶺

朱子

去路霜威勁歸程雪意深
往還無幾日景物變千林
曉磴初移屐寒雲欲滿襟
玉梅疎半落猶足慰幽尋

槍竿嶺

元

貢奎

薄宦辭家遠經秋未得歸
直隨山北去却背鴈南飛
川

靜白雲起郊平紅葉微憶曾留宿處立馬認還非

將干嶺

元 貢師泰

絕頂低南斗重關壯北門隴雲浮地白谷水帶泥渾宇
宙神功大山河帝業尊小臣叨載筆華髮感深恩

靈峰嶺

明 樊 阜

嶺路青林杪盤迴出白雲寺樓當塢見野碓隔谿聞屐
潤苔花積衣香藥草熏崖陰仙洞在遙見鹿成羣

七言律

度東山嶺

明

程敏政

石橋駐馬問田翁一塢深深隔樹東
帝子閣前沙似粟野神祠下路如弓
疎松古磴風微動細草陰崖雪半融
回望紅塵纔數里不知身在亂山中

五言絕句

登嶺望

唐

許鼎

淼淼三江水悠悠五嶺關
鴈飛猶不度人去若為還

七言絕句

嶺南路

唐

朱慶餘

越嶺向南風景異
人人傳說到京城
經冬來往不踏雪
盡在刺桐花下行

大散嶺

唐

羅鄴

過往長逢日色稀
雪花如掌撲行衣
嶺頭却望人來處
特地身疑是鳥飛

王干三嶺

元

方回

澄練平臯水屈盤
青蒼松櫟擁峰巒
巒霜晴邨落全如畫

一見都忘上嶺難

槍竿嶺

元
貢奎

百折迴岡勢欲迷
舉頭山寺與雲齊
經行絕似江南路
落日青林杜宇啼

御定佩文齋詠物詩選卷七十五

欽定四庫全書薈要卷一萬八千六百九十八集部

御定佩文齋詠物詩選卷七十六

巖類

五言古

安陸白兆山桃花巖寄劉侍御綰

唐

李白

雲卧三十年好閒復愛仙蓬壺雖冥絕鸞鶴心悠然歸
來桃花巖得憩雲窗眠對嶺人共語飲潭猿相連時昇

翠微上邈若羅浮巔兩岑抱東壑一嶂橫西天樹雜日
易隱崖傾月難圓芳草換野色飛蘿搖春煙入遠構石
室選幽開山田獨此林下意杳無區中緣永辭霜臺客
千載方來旋

宴坐巖

宋

劉子翬

青青橈樹林下蔭蒼蘚石幽人宴坐時懷抱忘其適不
見暮樵歸寒山雨中碧

七言古

朝陽巖下歌

唐
元結

朝陽巖下湘水深
朝陽洞口寒泉清
零陵城郭夾湘岸
巖洞幽竒帶郡城
荒蕪自古人不見
零陵徒有先賢傳
水石為娛安可羨
長歌一曲留相勸

五言律

早春題少室東巖

唐
白居易

二十六峰晴雪消
嵐翠生月留
三夜宿春引
四山行遠
草初含色寒禽未變聲
東巖最高石惟我有題名

桃巖憶賈島

唐

顧非熊

路向桃巖去，多行洞壑間。
鶴聲兼野靜，谿色帶邛閒。
疎葦秋前渚，斜陽雨後山。
憐君不得見，詩思最相關。

化成巖

宋

戴復古

城郭囂塵外，江山勝概中。
鏗然一灘水，和以萬松風。
夾徑森危石，孤亭納太空。
蒼巖不能語，曾識贊皇公。

章巖

宋

朱子

豁爾天開宇，呀然夜不扃。
閒雲任棲宿，密雨斷飄零。
老

屋僧常住高軒客屢經古今題寫處一半蘚紋青

次韻擇之章巖

朱子

驅馬倦長道投鞭憩此巖來應六鼇戴跡是五丁剗泉
脉流青澗林梢擁碧巉老禪深閉戶客子且征衫

登靈巖

明

陳秀民

寶殿壓崔嵬華池頂上開山從太白出水自洞庭來閣
樹聯珠塔巖花照石臺吳王清暑地那得有塵埃

登拂水巖

明

顧雲鴻

一杖入叢筍春泉處處生巖侵湖墅近崖豁海門平雲
逕分樵出風林帶鳥傾盤回千嶂盡下界一雞鳴

七言律

西巖

宋

余靖

萬壑千巖鬪物華
搯筇閒訪道生涯
一壇星斗修真館
數里雲霞劓藥家
魚戲竹谿寒影碎
路穿松塢翠陰斜
桃源自有神仙宅
未信明河八月槎

題將軍巖

宋

劉子翬

昔年棲險人何在彷彿樓臺杳靄間事去長空飛鳥沒
時清宴坐一僧閒霜秋石壁黃金樹月夜雲濤碧玉灣
杖策時來訪竒絕漁樵幽興自相關

和人遊西巖

宋

朱子

平生壯志浩無窮老寄寒泉亂石中間去披襟弄清泚
靜來合眼聽玲瓏不知澗寺晴時雨何似谿亭落葉風
吟罷君詩自瀟灑此心端不限西東

劉仙巖

元

雅勒呼

削雲千丈倚蒼崖
箭括通天一竅開
草樹陰森藏洞府
煙霞縹緲護樓臺
白雲已向空中去
黃鶴時聞月下來
欲向仙翁借筇杖
凌高長嘯望蓬萊

五言絕句

竹巖

唐

張籍

獨入千竿裏
緣巖踏石層
筍頭齊欲出
更不許人登

逍遙巖

元

杜本

鵬搏九萬里
籬鷄飛只尺
所以達觀人
亦各適其適

七言絕句

夏日登鶴巖

唐

戴叔倫

天風吹我上層岡，露灑長松六月涼。
願借老僧雙白鶴，碧雲深處共翱翔。

奉和子服老弟黃楊游洲巖

宋

朱子

聞道黃楊山上頭，千峰環抱石泉幽。
羨君拄杖年年去，飽看人間萬頃秋。

其二

游洲巖下水泠泠枕石何妨夢裏聽
要與他年成故事
謾尋幽處著新亭

雲巖

明

陶望齡

丹壑蒼崖處處鐘
夜深天畔有孤筇
寒燈一點松龕裏
照見雲間五老峰

御定佩文齋詠物詩選卷七十六

欽定四庫全書蒼要卷一萬八千六百九十九

集部

御定佩文齋詠物詩選卷七十七

洞類

五言古

題韋少保靜恭宅藏書洞

唐

闕名

高意合天制自然狀無窮仙華凝四時玉蘚生數峰書
秘漆文字匣藏金蛟龍閉為氣候肅開作雲雨濃洞隱
諒非久巖夢誠必通將綴文士集貫就真珠叢

秦越人洞中詠

唐
于鵠

扁鵲得仙處傳是西南峰
年年山下人長見騎白龍
洞門黑無底日夜惟雷風
清齋將入時戴星兼抱松
石逕陰且寒地響知遠鐘
似行山林外聞葉履聲重
低礙更俯身漸遠晝夜同
時時白蝙蝠飛入人衣中
行久路轉窄靜聞水淙淙
但願逢一人自得朝天宮

碧落洞

宋
蘇軾

槎牙亂峰合晃蕩絕壁橫
遙知紫翠間古來仙釋并
陽

崖射朝日高處連玉京陰谷叩白月夢中遊化城果然
石門開中有銀河傾幽龕入窈窕別戶列虛明泉流下
珠琲乳湔交縵纓我行畏人知恐為仙者迎小語輒響
答空山自雷驚策杖歸去來治具煩方平

左史洞

宋
沈遼

萬古齊山石誰為左史洞左史今何在蒼崖本不動履
險下重壑幽深鬼神總石門絕世路久為塵泥擁青天
十畝地嶮屹如覆瓿琬琰鑿屋壁煙霞列梁棟崖間不

老藥必非近時種人去境長在境以人為重欲觀疇昔
意幽禽發清唳吾方寄淵寂無礙亦無縱手自剪荆榛
結茅當石空長與麋鹿遊不復人間夢

遊鼓山靈源洞

宋

蔡襄

郡樓瞻東方嵐光瑩人目乘舟逐早潮十里登南麓雲
深翳前路樹暗迷幽谷朝雞亂木魚晏日明金屋靈泉
注石竇清吹出篁竹飛毫劃峭壁勢力忽驚觸捫蘿躋
上峰太空延眺矚孤雲浮海山長白挂天瀑况逢肥遯

人性尚自幽獨西景復向城淹留未云足

白雲洞

元
安
熙

峩峩兩峰間崔嵬聳雙闕中有仙人洞恍若仇池穴朝
開白雲生暮掩白雲滅朝昏有竒變宛與人境隔我來
蹇綠蘿深尋得幽絕平生棲遯志茲焉益超越未成長
往計復愧固窮節永懷靜修銘淒其仰前哲會當結茅
屋來此寄踈拙沈思畢舊聞長歌抱明月白雲應更深
老眼益清徹未敢持贈人聊爾自怡悅

張公洞

明

馬愈

懸崖瀉紅泉石洞挂鐘乳
仙房碧玉梯清涼了無暑
仙人洞口呼相隨看花去
欲往還自迷雲深不知處

水濱洞

明

王守仁

送遠憩岵谷濯纓俯清流
沿谿陟危石曲洞藏深幽
花靜馥常悶溜暗光亦浮
平生泉石好所遇成淹留
好鳥忽雙下儵魚亦羣游
坐久塵慮息澹然與道謀

七言古

無為洞口作

唐

元結

無為洞口春水滿無為洞傍春雲白愛此踟躕不能去
令人悔作衣冠客洞傍山僧皆學禪無求無欲亦忘年
欲問其心不能問我到此中得無悶

五言律

宿華陽洞寄元稱

唐

李端

花洞晚陰陰仙壇隔杏林漱泉春谷冷擣藥夜窓深石
上開山酒松間對玉琴戴家谿北住雪後去相尋

張公洞

唐

皇甫冉

雲開小有洞日出大羅天
三鳥隨王母雙童翊子先
何時種桃核幾度看桑田
倏忽煙霞裏穿巖騎更旋

潺湲洞

唐

陸龜蒙

石淺洞門深潺湲萬古音
似吹雙羽管如奏落霞琴
倒穴漂龍沫穿松濺鶴襟
何人乘月弄應作上清吟

玉女洞

宋

蘇軾

洞裏吹簫子終年守獨幽
石泉為曉鏡山月當簾鉤
歲

晚杉楓盡人歸霧雨愁送迎應鄙陋誰寄楚臣謳

七言律

桃源洞

唐
章 碣

絕壁相敵是洞門昔人從此入仙源數株花下逢珠翠
半曲歌中老子孫別後自疑園吏夢歸來誰信釣翁言
山前空有無情水猶繞當時碧樹村

遊張公洞寄陶校書

唐
方 干

步步勢穿江底去此中危滑轉身難下蒸陰氣松蘿濕

外制溫風杖屨寒數里煙雲方覺異前程山水更應寬
由來委曲尋仙路不是先生換骨丹

陽明洞

元 韓性

日日携壺坐釣磯眼看門外軟紅飛已無遊騎尋芳草
却訪幽人入翠微石磴欲青春雨足酒罏初冷絮花稀
悠然自解登臨意十里香風一棹歸

七言絕句

桃源洞

唐 李羣玉

我到瞿真上昇處山川四望使人愁紫雲白鶴去不返
惟有桃花谿水流

題武陵洞

唐

曹唐

此生終使此身閒不是春時且要還寄語桃花與流水
莫辭相送到人間

其二

却恐重來路不通殷勤回首謝春風白雞黃犬不將去
且寄桃花深洞中

其三

谿口回舟日已昏，却聽雞犬隔前村。
殷勤重與秦人別，莫使桃花閉洞門。

其四

桃花夾岸杳何之，花滿春山水去遲。
三宿武陵谿上月，始知人世有秦時。

題合谿乾洞

唐于鵠

渡水傍山尋絕壁，白雲飛處洞天開。
仙人來往行無跡。

石徑春風長綠苔

浮山洞

宋

蘇軾

人言洞府是鰲宮
升降隨波與海通
共坐船中那得見
乾坤浮水水浮空

遊三游洞

蘇軾

凍雨霏霏半成雪
遊人屨冷蒼苔滑
不辭携被巖底眠
洞口雲深夜無月

榴花洞

宋

蔡襄

洞裏花開無定期
落紅曾見逐泉飛
仙人應向東山口
管却春風不與歸

煙霞洞

元

丘處機

山雲勃勃湧驚濤
海水漫漫浸巨鰲
極目下觀千萬里
扶桑依約見蟠桃

其二

白石磷磷繞洞泉
蒼松鬱鬱鎖寒煙
碧桃花發朱櫻秀
別是人間一洞天

其三

海曲山阿洞府低
蓬壺閬苑海東西
仙人玉女時遊集
不許桃源過客迷

小三洞

元
于石

四山迴合響幽泉
古木蒼藤路屈盤
一局碁殘雙鶴去
石屏空倚白雲寒

其二

洞門相對是吾家
朝看煙雲暮看霞
鐵笛一聲山石裂

老松驚落半巖花

其三

斷崖怒湧四時雪
虛壁寒凝六月霜
倚樹老僧閒洗鉢
碧桃花落澗泉香

御定佩文齋詠物詩選卷七十七

欽定四庫全書蒼苔要卷一萬八千七百集部

御定佩文齋詠物詩選卷七十八

谷類

五言古

秋曉行南谷經荒邨

唐

柳宗元

杪秋霜露重晨起行幽谷黃葉覆谿橋荒邨惟古木寒
花踈寂歷幽泉微斷續機心久已忘何事驚麋鹿

李老谷

谷中多
杜鵑

元

納新

高秋遠行邁入谷雲氣暝稍稍微雨來漸怯衣裳冷縈
紆青崦窄杳窳煙林迴峰迴忽開豁夕陽散微影霜葉
落秋澗寒花媚秋嶺路窮見土屋人煙雜墟井平生愛
山癖悵此愜幽靜月落聞子規懷歸心耿耿

晦日稍次山谷

明林敏

清谿殊險豁石瀨何淙淙尋源竟莫測又復上幾重行
處衆壑盡望中天影空於焉倏含景水木相玲瓏濕翠
翳巾烏片雲起西峰忽忽洞深杳大圓變溟濛飛端逗

日月急雨隨蛟龍洗心投白鳥息見期青松願因紫霞
秘永諧鸞鶴蹤

五言律

愚公谷

唐

王維

吾家愚谷裏此谷本來平雖則行無跡還能響應聲不
隨雲色暗只待日光明緣底名愚谷都由愚所成

春谷幽居

唐

錢起

黃鳥鳴園柳新陽改舊陰春來此幽興宛是謝公心掃

徑蘭芳出添池山影深虛名隨振鷺安得久棲林

過吳兒谷

宋

韓琦

曉入吳兒谷危途信不虛千峰疑絕路一逕甫容車山
鳥過雲語田夫半嶺鋤時平盡周道天險欲何如

庶先北谷

宋

文同

路自西谿入園當北谷開月亭詩作客雨館睡為媒摘
果衣霑露尋泉履漬苔閒居正無事莫問我頻來

九里谷

金

李俊民

九曲羊腸路千層劍戟山行鈎藤蔓刺坐印石花斑樹
發三春暮雲歸萬壑間相陪林下屐雖倦不知還

五言排律

奉和聖製答張說扈從南出雀鼠谷

唐

趙冬曦

軒轅應順物力牧正趨陪道合殷為礪時行楚有材省
方西禮設振旅北京迴地理分中壤天文照上台寒依
汾谷去春入晉郊來竊比康衢者長歌仰大哉

奉和聖製答張說扈從南出雀鼠谷

唐

王邕

襟帶三秦接旂常萬乘過陽原淑氣早陰谷
沍寒多花縹前茅仗霜嚴後殿戈代雲開晉
嶺江鴈入汾河北土分堯俗南風動舜歌一
聞天樂唱恭遂萬人

奉和聖製答張說扈從南出雀鼠谷

唐

崔翹

硤路繞河汾晴光掃曙氛笳吟中嶺樹仗入
半峰雲頓

覺山原盡平看邑里分早行芳草遠晚憩好風薰嘉頌
推英宰春遊扈聖君共欣承睿渥日月照天文

奉和聖製同二相南出雀鼠谷

唐
張九齡

設險諸侯地承平聖主巡東君朝二月南旆擁三辰寒
出重關盡年隨行漏新瑞雲叢捧日芳樹曲迎春舞詠
先馳道恩華及從臣汾川花鳥意併奉屬車塵

七言律

春谷

宋

朱子

武夷高處是蓬萊
采得靈根手自栽
地僻芳菲鎮長在
谷寒蜂蝶未全來
紅裳似欲留人醉
錦障何妨為客開
飲罷醒心何處所
遠山重疊翠成堆

五言絕句

雲谷

宋

朱子

閒雲無四時
散漫此山谷
幸乏霖雨姿
何妨媚幽獨

七言絕句

宿青牛谷

唐
楊 衡

隨雲步入青牛谷
青牛道士留我宿
可憐夜久月明中
惟有壇邊一林竹

篔簹谷

宋
文 同

池通一谷波溶溶
竹夾兩岸煙濛濛
尋幽直去景漸野
宛爾不似在塵中

黃花谷

金
元 好問

團團石甕琢青瑤
仰面看雲覺動搖
誰著天瓢灑飛雨

半空翻轉玉龍腰

同劉勸農彥和葛縣令祐之遊蒼谷口

元

王暉

四山遮盡外來風
山崦人家不覺冬
獨立蒼崖重回首
山形渾似入居庸

其二

方山忽斷兩崖開
中有蒼河自北來
行出山門俱不見
玉龍翻作地中雷

御定佩文齋詠物詩選卷七十八

欽定四庫全書蒼齋要卷一萬八千七百一

集部

御定佩文齋詠物詩選卷七十九

島嶼類

五言古

登江中孤嶼

宋

謝靈運

江南倦歷覽江北曠周旋
懷新道轉迴尋異景不延亂
流趨正絕孤嶼媚中川雲日相輝映
空水共澄鮮表靈物莫賞蘊
真誰為傳想像崑山姿綿邈區中緣
始信安

期術得盡養生年

登江中孤嶼贈白雲先生王迴

唐

孟浩然

悠悠清江水水落沙嶼出迴潭石下深綠篠岸傍密鮫
人潛不見漁父歌自逸憶與君別時泛舟如昨日夕陽
開返照中坐興非一南望鹿門山歸來恨相失

五言律

詠島

唐

薛能

孤島如江上詩家猶閉門一池分倒影空舸繫荒根煙
濕高吟石雲生偶坐痕登臨有新句公退與誰論

竹嶼

元
余闕

秋水鏡臺隍孤洲入淼茫地如方丈好山接會稽長紫
萸林中合紅蓮葉底香何人酒船裏似是賀知章

七言律

湄洲嶼

元
張翥

飛舸鯨濤渡渺冥祠光壇上夜如星蛟龍筍簾懸金石

雲霧衣裳集殿庭萬里使輶遊冠絕千秋海甸仰英靈
乘槎欲借天風便彷彿神仙一髮青

五言絕句

孤嶼

唐

韓愈

朝遊孤嶼南暮戲孤嶼北所以孤嶼鳥與公盡相識

蓼嶼

宋

文同

孤嶼蓼花深清波照寒影時有雙鷺鷺飛來作佳景

御定佩文齋詠物詩選卷七十九

欽定四庫全書蒼要卷一萬八千七百二

集部

御定佩文齋詠物詩選卷八十

石類

五言古

詠孤石

梁
朱超

侵霞去日近
鎮水激流分
對影疑雙闕
孤生若斷雲
遇風靜華浪
騰煙起薄曛
雖言近七嶺
獨立不成羣

詠石

陳
陰鏗

天漢支機罷仙嶺博棋餘零陵舊是燕昆池本學魚雲
移蓮勢出苔駁錦紋疏還當穀城下別自解兵書

詠孤石

陳
僧惠標

中原一孤石地理不知年根含彭澤浪頂入香鑪煙崖
成二鳥翼峰作一笑蓮何時發東武今來鎮蠡川

詠孤石

陳
僧定法

迴石直生空平湖四望通巖根恒灑浪樹杪鎮搖風偃
流還漬影侵霞更上紅獨拔羣峰外孤秀白雲中

奉和周趙王詠石

隋

崔仲方

玉繩隨月落金碑映日鮮
入江疑濯錦出峽似開蓮
文馬河西瑞兵符濟北篇
會逐靈槎上還歸天漢邊

賦得石

隋

虞茂

蜀門鬱遐阻燕碣遠參差
獨標千丈峻共起百重危
鏡峰含月魄蓋嶺逼雲枝
徒然抱貞介填海竟誰知

賦得臨階危石

隋

岑德潤

當階聳危石殊狀實難名
帶山疑似獸侵波或類鯨
雲

峰臨棟起蓮影入檐生楚人終不識徒自蘊連城

爛柯石

唐孟郊

仙界一日內人間千歲窮雙棋未徧局萬物皆為空樵
客返歸路斧柯爛從風惟餘石橋在猶自凌丹虹

泰山石

唐李德裕

雞鳴日觀望遠與扶桑對滄海似鎔金衆山如點黛遙
知碧峰首猶立煙嵐內此石依五松蒼蒼幾千載

疊石

李德裕

潺潺桂水端漱石出奇狀鱗次冠煙霞蟬聯疊波浪今
來碧梧下迥出秋潭上歲晚苔蘚滋懷賢益悵

枕流石

唐
費冠卿

不為幽岸隱古色涵空出願以清泚流鑿此堅貞質傍
臨玉光潤時瀉苔花密往往驚游鱗尚疑垂釣日

石版

唐
李咸用

高人好自然移得他山碧不磨如版平大巧非因力古
蘚小青錢塵中看野色冷倚砌花春靜伴疎篁直山僧

若轉頭如逢舊相識

臨流石

宋朱子

偃蹇西澗濱
枵然似枯木
下有幽泉鳴
上有蒼苔綠
來往定何人
山空此遺躅

七言古

附長短句

題曲阿三昧王佛殿前孤石

唐劉長卿

孤石自何處
對之疑舊遊
氛氲峴首夕
蒼翠剡中秋
迴出羣峰當
殿前雪山靈
鷲慚貞堅
一片孤雲長
不去莓

苔古色空蒼然

望夫石

唐王建

望夫處江悠悠化為石不回頭
山頭日日風復雨行人歸來石應語

題祖山人池上怪石

唐張碧

寒姿數片竒突兀曾作秋江秋水骨
先生應是厭風雲著向江邊塞龍窟
我來池上傾酒尊半酣畫破青煙痕
參差翠縷擺不落筆頭驚怪粘秋雲
溶溶水墨有高價

邀得將來倚松下鋪却霜繒直道難掉首空歸不成畫

石版歌

唐

李咸用

雲根劈裂雷斧痕龍泉切璞青皮皴直方挺質貞且真
當庭卓立疑頑神春雨流膏成玉文主人性靜看長新
明月夜來迴短影何如照冷太湖濱

雪浪石

宋

蘇軾

太行西來萬馬屯勢與岱嶽爭雄尊飛狐上黨天下脊
半掩落日先黃昏削成山東二百郡氣壓代北三家邨

千峰石卷蟲牙帳懸崖鑿斷開土門竭來城下作飛石
一礮驚落天驕魂承平百年烽燧冷此物僵卧枯榆根
畫師爭摹雪浪勢天工不見雷斧痕離堆四面繞江水
坐無蜀士誰與論老翁兒戲作飛雨把酒坐看珠跳盆
此身自幻孰非夢故園山水聊心存

桐關大石

元方 夔

蓋天蒼蒼非虛空高懸萬象驚愚蒙仙人朝罷玉帝側
戲拋黃土留遺踪何年墮此作砥柱千古屹立洪濤中

巨魚出沒深不測罅縫草長蒲花茸淙淙細浪夜春擊
水石鞮鞢鏗金鐘我来載酒坐其上扁舟南下編青蓬
飲酣恍恍欲飛去如踞猛虎騎游龍夜深酒醒山月落
一曲短笛橫秋風

五言律

詠石

唐
蘇味道

濟北甄神貺河西濯錦文聲應天池雨影觸岱宗雲燕
歸猶可候羊起自成羣何當握靈髓高枕絕囂氛

詠石

唐
李嶠

宗子維城固將軍飲羽威巖花鏡裏發雲葉錦中飛入
宋星初墮過湘燕早歸倘因持補極寧復羨支機

太湖石

唐
白居易

煙翠三秋色波濤萬古痕削成青玉片截斷碧雲根風
氣通巖穴苔文護洞門三峰具體小應是華山孫
興平縣野中得落星石移置縣齋

唐
韓琮

的的墮芊芊蒼茫不記年幾逢疑虎將應逐犯牛仙擇
地依蘭畹題詩問錦牋何時成五色却上女媧天

三生石

唐
僧修睦

聖迹誰會得每到亦徘徊一尚不可得三從何處來清
宵寒露滴白晝野雲隈應是表靈異凡情安可猜

次韻張希孟凝雲石

元
袁
桷

我愛凝雲好朝昏境不同金芽養靈谷鐵網起晴空月
色古今正潮痕子午中點頭那有意吾欲問生公

其二

我愛凝雲好神清湛欲留岷峨千古雪秦華一天秋獨
鶴離羣皎層冰出澗幽無言有深抱山立正揚休

大石

明彭年

陽山青不斷陰壑路疑窮鰲竦凌松杪驂駢歷桂叢隔
雲分野綠穿月逗中空勝絕畱孤賞踈鐘出梵宮

五言排律

奉和牛相公題姑蘇所寄太湖石見示兼寄李

蘇州

唐
劉禹錫

震澤生竒石沈潜得地靈
初辭水府出猶帶龍宮腥
發自江湖國來榮卿相庭
從風夏雲勢上漢古查形
拂拭魚鱗見鏗鏘玉韻聆
煙波含宿潤苔蘚助新青
嵌穴猗雛貌織鋏蟲篆銘
孱顏傲林薄飛動向雷霆
煩熱近還散餘醒見便醒
凡禽不敢宿浮塏莫能停
靜稱垂松蓋鮮宜映鶴翎
忘憂常目擊素尚與心冥
眇小欺湘燕團圓笑落星
徒然想融結安可測年
齡採取詢鄉老搜求

按舊經垂鈎入空隙隔浪動晶熒有獲人爭賀歡謠衆
共聽一州驚閱寶千里遠揚舲觀物洛陽陌懷人吳御
亭寄言垂天翼早晚起滄溟

奉和思黯相公以李蘇州所寄太湖石竒狀絕
倫因題二十韻見示兼呈夢得

唐

白居易

錯落復崔巍蒼然玉一堆峰駢仙掌出罅拆劒門開峭
頂高危矣蟠根下壯哉精神欺竹樹氣色壓亭臺隱起

嶙嶙狀疑成瑟瑟胚廉稜露鋒刃清越叩瓊瑰爰葉形
時動嵬峨勢欲摧竒應潛鬼魅靈合蓄風雷黛潤沾新
雨斑明點古苔未應棲鳥雀不肯染塵埃尖削琅玕筍
窪剗瑪瑙壘海神移碣石畫障簇天台在世為尤物于
人負逸才渡江一葦載入洛五丁推出處雖無意升沈
亦有媒拔從水府底置向相庭隈對稱吟詩句看宜把
酒杯終隨金礪用不學玉山頽踈傳心偏愛園公眼屢
迴共嗟無此分虛管太湖來

居易與夢得俱典姑蘇而不獲此石也

織女石

唐
童翰卿

一片昆明石千秋織女名
見人虛脈脈依水更盈盈
苔作輕衣色波為促杼聲
岼雲連鬢濕沙月對眉生
有臉蓮同笑無心鳥不驚
還如朝鏡裏形影兩分明

七言律

林間石

宋
林逋

入夜跣趺多待月移時
箕踞為看山苔生晚片
應知靜雲動秋根
合見閒瘦鶴獨隨行
藥後高僧相對試茶間

疎篁百本松千尺莫怪頻頻此往還

五言絕句

望夫石

唐
劉方平

佳人成古石
蘚駁覆花黃
猶有春山杏
枝枝似薄粧

盤石磴

唐
張籍

疊石盤空遠
層層勢更危
不知行幾匝
得到上頭時

遊西江泊苧蘿山下題西施石

唐
王軒

嶺上千峰秀江邊細草春
今逢浣紗石不見浣紗人

題羅浮石

唐李德裕

清景持芳菊涼天倚茂松
名山何必去此地有羣峰

題竒石

李德裕

蘊玉抱清暉閒庭日瀟灑
塊然天地間自是孤生者

題新定八松院小石

唐杜牧

雨滴珠璣碎苔生紫翠重
故關何日到且看小三峰

拜嶽石

宋趙抃

片石倚中天雲深鳥道間人多祝堯壽登此拜南山

山堂前庭有奇石數種其狀皆與物形相類在

此久矣自余始名而詩之

宋文同

鸚鵡石

靜立身微聳驚窺首略回何人將至此應自隴山來

柘枝石

紫蘚裝花帽紅藤纏臂幘被誰留斷拍長舞不教休

狻猊石

巨尾蟠深草豐毛覆古苔雕欄臨綺席長欲上香臺

崑崙石

雨漬身如漆苔侵面若藍問時都不語應是憶扶南

珊瑚石

海底初生處扶疎苦未全幾時隨鐵網流落漢江邊

千人石

明高啟

池上無陀石千人列坐曾如今趺夜月唯有一山僧

七言絕句

南侍御以石相贈助成水聲因以絕句謝之

唐
白居易

泉石磷磷聲似琴
閒眠靜聽洗塵心
莫輕兩片青苔石
一夜潺湲直萬金

西施石

唐樓穎

西施昔日浣紗津
石上青苔思煞人
一去吳宮不復返
岼傍桃李為誰春

南園湖石

金
王子可

翠雀銜雲墮翠蕪砥峰倒影卧平湖
飛花不到穿簾月
高倚晴天一劔孤

御定佩文齋詠物詩選卷八十

欽定四庫全書蒼要卷一萬八千七百三

集部

御定佩文齋詠物詩選卷八十一

石壁類

五言古

明慶寺石壁

北周

王褒

夏水懸臺際秋泉帶雨餘石生銘字長山久谷神虛

涇縣石壁道中

元

貢師泰

萬山從西來中斷忽如劈攢峰阻重關兩崖立堅壁絕

壑噴飛流觸石勢逾激神龍宅其下白晝飛霹靂涉險
恐羸驂凌高快健翮須臾得仙館頗覺契幽寂入竹敞
涼軒掃花吹鐵笛坐久竟忘疲塵襟忽如滌翻思崎嶇
間使我心戚戚

天池石壁為鐵雅賦

元張雨

嘗讀枕中記華山閼中吳神泉發其巔青壁繚其隅春
風四山來羣綠互紛扶羽觴曲折行浮花與之俱採芝
搴薜荔洗玉弄芙蓉聲叟頗好名石窪作魚湖鴻一志

草堂枕煙遂成圖而此滌煩磯閱世如檣蒲發興雲林
子盥手與我摹居然縮地法挈入壺公壺

七言古

赤壁泛舟

元周權

赤壁之山何峻嶒下有江水何清冷天空月出夜寥泐
玻璃萬頃涵秋水為問黃州雪堂老遷官何如謫官好
酒酣携客夜擎舟憂患都将談笑了劃然長嘯來天風
神遊八極世慮空但見橫江秋露白錯落低垂斗柄紅

洞簫聲斷潛蛟舞
月下清尊貯千古
老瞞當日困周郎
十萬樓船鬪貔虎
煙消水冷沈戈矛
空餘野燐寒沙頭
江山牢落滿陳跡
追憶往事懷風流
勝遊到我知幾度
感昔視今猶旦暮
乾坤何事老英雄
袞袞長江自東去

七言絕句

赤壁

唐杜牧

折戟沈沙鐵未銷
自將磨洗認前朝
東風不與周郎便
銅雀春深鎖二喬

赤壁

唐胡曾

烈火西焚魏主旗，周郎開國虎爭時。
交兵不假揮長劍，已挫英雄百萬師。

赤壁

唐孫元晏

會獵書來舉國驚，祇應周魯不教迎。
曹公一戰奔波後，赤壁功傳萬古名。

題泗濱南山石壁曰第一山

宋米芾

京洛風沙千里還，船頭出汴翠屏間。
莫論衡霍撞星斗，

且是東風第一山

御定佩文齋詠物詩選卷八十一

欽定四庫全書蒼要卷一萬八千七百四

集部

御定佩文齋詠物詩選卷八十二

假山類

五言古

奉和裴僕射相公假山

唐韓愈

公乎真愛山看山旦連夕猶嫌山在眼不得著脚力往
語山中人丐我澗側石有來應公須歸必載金帛當軒
乍軒羅隨勢忽開拆有洞若神剗有巖類天劃終朝巖

洞間歌鼓宴賓戚孰謂衡霍竒近在王侯宅傅氏築已
卑礮谿釣何激逍遙功德下不與事相撫樂我盛朝時
于焉傲今昔

家園假山

金元德明

八尺飛來峰蒼然立於獨細看甲乙字疑是平泉族山
非一艸石見石山亦足便恐東岫雲來我檐下宿今朝
鑿盆池明朝種松菊自笑住山人何時返巖谷

五言律

天寶初南曹小司寇舅於我太夫人堂下累土
為山一匱盈尺以代彼朽木承諸焚香瓷甌
甌甚安矣旁植慈竹蓋茲數峰嶽岑嬋娟宛
有塵外數致乃不知興之所至而作是詩

唐杜
甫

一簣功盈尺三峰意出羣望中疑在野幽處欲生雲慈
竹春陰覆香爐曉勢分維南將獻壽佳氣日氤氳

五言排律

奉和盧大夫新立假山

唐許渾

巖谷留心賞為山極自然孤峰空迸筍攢萼旋開蓮黛
色朱樓下雲形繡戶前砌塵凝積靄檐溜掛飛泉樹暗
壺中月花香洞裏天何如謝康樂海嶠獨題篇

七言律

奉和太常韋卿閣老左藏庫中假山之作

唐權德輿

春山仙掌百花開九棘腰金有上才忽向庭中募峻極

如從洞裏見昭回小松已負干霄狀片石皆疑縮地來
都內今朝似方外仍傳麗句寄雲臺

寄題徐都官新居假山

宋梅堯臣

太湖萬穴古山骨共結峰嵐勢不孤苔徑三層平木末
河流一帶接牆隅已知谷口多花藥祇欠林間落狢鼯
誰侍中構此行樂里中遺老肯相呼

和人假山

宋蘇軾

上黨攬天碧玉環絕河千里抱商顏試觀煙雨三峰外

都在靈仙一掌間造物何如童子戲寫真聊發使君閒
何當挈取西征去畫作圍牀六曲山

五言絕句

詠小山

唐太宗

近谷交繁蕊遙峰對出蓮徑細無全磴松小未含煙

假山

宋王十朋

君有好山癖疊山亭院間不遮山外眼又得見真山

七言絕句

累土山

唐白居易

堆土漸高山意出終南移入戶庭間玉山藍水應惆悵
恐見新山忘舊山

西蜀淨衆寺七祖院小山

唐鄭谷

小巧功成雨蘚斑軒車日日叩松關峨嵋咫尺無人去
却向僧窓看假山


過小院僧窓有假山絕妙作廬山勢書此

宋僧惠洪

盧阜歸心久未降
夢魂時復渡湓江
忽驚古寺秋庭上
翠甍煙巒對矮窓



御定佩文齋詠物詩選卷八十二



總校官庶吉士臣侍朝

校對官中書臣王濱

謄錄監生臣汪兆鯤

謄錄監生臣趙位堂